

天柱縣志上卷

天柱縣知縣事王復宗彙輯

輿圖

嘗稽輿圖脩攷而知隸九有之版章扼四方之險
要靡不列如睂睫其殆祖職方氏而師其遺意與
爰約畧其大槩則疆域固吾圉也星野紀分躔也
沿革考制度也形勝風俗量廣狹辨淳澆也山川
古蹟平原隰驗碑碣也城池公署相金湯之勢而
度陰陽之宜也學校廟壇廣教化於無疆而憑依
將在是也關梁郵舍防奸宄之出入而備往來之
迎送也至若坊鄉之遠近田戶之多寡與夫庶物
之所生殖尤爲不可闕者使不按輿圖而登版籍
曷有賴焉

疆域

按九州分野得百里之國而君之蓋相爲表裏者
封建與井田是也楚南之天柱屈在邊隅三苗西
接六詔南連雖曰無此疆爾界而內外之防遠近
之別烏可不辨焉况苗蠻雜處保無有狡焉思逞
而禍及鄰封者歟則疆域在所首重也

縣治在州城西南陸路一百六十里東至會同界蘇
家團八十里至會同一百二十里東南至靖州界銅
羅段一百里南至瀟洞司茅坪八十里至銅鼓衛一

百八十里西南至外界皮所一百里西至瀟洞司平
征六十里至瀟洞司八十里西北至鎮遠界外革溪
八十里北至沅州界琉璃山一百里至沅州一百八
十里東北至會同界蒲文九十里東至湖南長沙布
政司陸路一千一百里北至湖北武昌府水路二千
三百三十里陸路一千六百八十里到京水路七千
三百里陸路五千八百二十里東西廣一百四十里
南北袤一百一十里

沿革

按建都立國凡因革損益興衰隆替雖曰天運使
朕蓋人事居其半焉叅舊志以刊新書端有賴於
留心經濟之一人而知通經術所以明世務也

天柱縣僻

夏禹貢荊州之界 周屬楚之西 秦黔中地

漢屬牂牁郡 梁唐宋屬誠州所轄卽今之靖州也
明洪武二十四年苗人猖獗楚王率領官軍征進大
坪小坪等處始撤靖州衛左千戶所以守禦之此天

天柱縣志

上卷

三

柱所之所由來越萬曆二十五年本所吏目朱梓撫
苗向化申詳兵備道徐公榜分守道鄭公鏡分巡道
陳公惇臨貴州巡撫江公東之湖廣巡撫李公得陽
巡按趙公文炳會疏請照武岡城步例改所爲縣照
山東費鄉二縣例以吏員陞縣令遂改爲天柱縣割
會同尚鄉口鄉汶溪并本所苗寨以成縣治爰設知
縣裁會同之主簿設典史裁本所之吏目設教諭裁
會同之訓導而鎮遠江東二司竝屬之由是巡撫江
公及三道徐公等親歷是方相陰陽形勝立縣署門

樓城郭其規模去所治遠矣朱君陞授其事百度俱
舉是縣也起于萬曆甲午成于丁酉迄今蓋九十有
餘紀焉

星野

按星野分躔凡以占雲物志災祥而天人相接之
會默運潛孚如銖黍不爽敬天勤民尚慎旃哉
軫宿分野

文獻通考翼軫則楚之分野翼二十二星凡十九
度軫七星凡十七度天柱在楚境內亦屬軫

漢書自張十七度至軫十一度爲鶉屬楚之分野
屬荊州天柱距荊州不遠疑不出軫之外

晉天文志楚零陵入軫十一度天柱近零陵當軫

天柱縣志

上卷

五

十七度後之君子仰而觀俯而察爲災爲祥不必
舍軫而他求也

附占侯

太白犯軫主兵辰星守軫主水

形勝

嘗攷築城修池一郡有一郡之形勢一邑有一邑之形勢蓋相陰陽觀流泉率是道爾天柱踞楚上游昆連黔粵扼要害而控苗蠻勿謂一柱擎天之可恃也在德不在險尚其誌之

天柱縣

上控黔東下襟沅芷囊百蠻而通食貨順江流而達辰常山川聳峻楠水東流界在黔楚之交尤為崗苗砥柱其云勝也凡有八焉詳見山川並入景詩

天柱縣志

上卷

六

柱石擎天

在縣東十里其形似柱高而圓舊云有鳥類鳳鳴於上縣之名始此

龍泉噴玉

在城東北之交觀音閣下

金鳳曉鐘

在縣北十五里其山形似鳳上立有庵晨起擊鐘遙聞數里悠狀可聽

鐵山冬雪

在縣北五里

春花夜月

在縣南十五里

嫩艸斜陽

在縣南城外演武堂前坪生嫩草四季如是夕陽斜照時更萋二可觀

茨嶺連雲

在縣東四十里

幞頭霧雨

在縣西五十里舊註云幞頭山也霧濛山頂定有大雨至今占望不爽

風俗

風俗之好尚非其人不治况楚風剽悍而天柱充
爲極邊不得其人以治之則十五國之歌謠未易
奏南薰鼓休和也昔化蜀郡遷柳州文翁子厚之
遺風不可攷而志歟

天柱未建縣時人以剽悍爲上苗以劫奪爲生開化
以來易刀劍而牛犢易左衽而冠裳好勇習戰之風
日益丕變

余治鳳城之明年爲木植之役紛馳岩壑間見夫

天柱縣志

上卷

七

火耕水耨宛若邠土之遺服食尚恬素吉凶稱有
無其風亦近淳古而三苗之俗以母党爲重婚媾
先中表而後外人遇病不藥而事祈禱遇喪不哭
而事鼓歌非善人相繼百年必不能易此風俗太
史公曰非一朝一夕之故其所由來者漸也信然
哉

山川

按衡嶽七十二峰疊巘層巒亘三百里而洞庭千頃澎湃中流分支於湘瀟雲夢之間若湖南其最著矣他如登二酉泛五溪而天柱一峰又居湖南之最與其危崖峻嶺莫可紀極此邦之人類皆直朴自尚或亦山川風氣之所稟歟雖狀維楚有材自昔稱之豈金鳳山頭獨無翹一其羽者哉王多吉士何地無人於茲竊有望焉

山

天柱縣志

上卷

八

煙燉山

去縣南三里在邑發脈之所其山來自天堂朱君封土于其上山足下建有稱香亭焉今廢其亭其碑可紀

金鳳山

高數百丈亘數十里見古蹟

鐵山坪

其地寬廣可容萬馬三面環以山一面連以水山隈積雪至春不消即兆年豐

涼傘山

去縣東十里其形如傘為柱邑秀峯

茨嶺山

其山兩峯對立長數里中澗丈餘樹木蒼鬱雲鎖其巔為柱邑扼要朱君因設太平堡廢今

大靈山

在縣東七十里上月間居民進香不絕

佑聖宮多靈驗三九

黃少山

去城南七十里舊立菴于上與黔屬茅坪接壤對山有五龍嶺相傳唐王巡行至此

鐵山 在縣西二十里石色如鐵鑿之頗堅

幟頭山 在縣西三十里山形下覆有霧籠罩即雨農家占之屢驗

春花山 在縣南三十里山下有寨七畔有池半畝清光夜發四時明晦皆狀因以名山

臺山 在縣北五里峯巒層折迤運而南故名曰臺

尖山 在縣北五里如浮屠挿天高不可極

筆架山 在縣北十里形如掌指樞星向其處似筆架然

柱石山 在縣北十五里上有石如柱此天柱所由名也

分水峒 在縣北七十里沅州交界處從山之與一水注沅一水歸天柱

蓬萊山 在縣北八十里三山列峙如蓬萊三島狀因名

天柱縣志

上卷

六

林排山 在二首岩門寨離縣東三十里下有流泉山勢排闥如木壁削成

急溜山 在二首離縣北三十里前後有溪山當急溜故名

簾箕山 在縣城東北五十里山形如箕

白雲山 在縣東北六十里上有梵刹四圍環以村寨晨暮炊烟如雲生其麓

岑朗山 在縣東北四十里其山如垂翅形溪水暗流其下

邦尚崖 在縣北十五里峭壁臨水鑿石路以通行人往來如走廊廡下溪橋繞麓梵刹踞巔

高雲山 在與文離縣東六十里山最高而雲生山下故名

元正山 在與文離縣六十里林剝蒼翠朝煙暮靄如米家一岫圖画

新舟山 在縣東五十里山如舟形水環流其下層上梵刹蔥蔚可觀

蓮花山 去縣西六十里其形似蓮花

寶林山 去縣北七十里 有庵其上

川

清水江

發源于黔屬苗界不知其幾千里由岔處至托口與渠水合至黔陽與沅水合并入辰河離縣五六七十里不等

北門江

發源于新溪城北百餘里遶城而下三十餘里至小江中與清江合

西江

發源于鬼括溪順流從西而下至城北五十餘里與北江合一帶田坵賴以灌養

白水冲

發源于南坡脚四時不涸郭外屯田賴所灌者約計五六百畝朱君築堤而分水焉夏名曰青龍澗

天柱縣志

上卷

九

灘

滑石灘

長灘

門坎灘

敗灘

石牛灘

蔣公灘

梗洞灘

橫巖灘

雷打灘

沸水灘

長喉灘

壩

巖寨壩

三座灌田一千二百畝

雷寨壩

二座灌田二百八十七畝

薄皮寨壩

二座灌田一千九百畝

伍家寨壩

一座灌田二百畝

烹寨壩

一座灌田七十畝

以上係一畝

度馬寨壩 二座灌田三百八十畝 江東寨壩 一座灌田三百畝

汶溪寨壩 二座灌田三百五十畝 岩門寨壩 一座灌田四十畝

新丹寨壩 一座灌田一百畝 長團寨壩 一座灌田一百畝

以上係二畝

楞寨壩 二座灌田六百五十畝 平地寨壩 一座灌田一百二十畝

都甫寨壩 二座灌田二百三十畝 金子寨壩 一座灌田一百五十畝

王家寨壩 一座灌田一百畝 地鎖寨壩 一座灌田一百畝

以上係三畝

劉家寨壩 一座灌田一百畝 擺頭寨壩 一座灌田一百畝

天柱縣志 上卷 十

邦洞寨壩 二座灌田一百九十畝 賴洞寨壩 一座灌田一百三十畝

三團寨壩 一座灌田一百六十畝 陂頭寨壩 一座灌田一百一十畝

以上係四畝

高野寨壩 一座灌田一百二十畝 以上係四畝 小溪壩 二座約灌屯田六百畝

以上係天柱所

附泉塘

龍泉 即入景之龍泉舊在城外為苗所困展城而圍入內焉清可澆脾胃暑能解渴冬暖夏涼飲多不傷灌田百餘畝可飲數千家鱉當大旱混二不竭若噴玉狀

龍塘 在城東十里灌田百有餘畝舊遷縣治于上更名龍塘縣

古蹟

嘗攷太史公抵沅湘弔蒼梧凡以為古蹟也昔賢之風流餘韻猶在人曠覽中苟聽其湮沒不彰亦甚非吾人表微闡幽之意也天柱設自有明幾二百年矣其間豈無幽泉恠壑為名勝之可傳者乎採而輯之備登諸乘以無負山谷效靈之意爰成一代之書以待後之品題其上者

楚王營

在縣南十五里昔日征苗駐蹕于此其址尚存

花娥寨

在縣南二十五里

天柱縣志

上卷

土

金剛山

去城東六十里相傳遠口羅漢寺有金剛二神飛昇其上土人異之為立寺焉在未建縣之先至今香火不衰

觀音巖

去城北渡江數百步累級而上登傍壁為閣由閣入洞洞門高廠稱奇觀焉恤部姚公履素為之記

仙姑井

在縣東五十五里

朱公堤

在南坡之麓澗水出其右居民爭水利以灌田坵往二鑿之公以此為邑脈過峽之處因築堤數丈通地脈固本基均水利益一舉而三善備焉誌見藝文

江東巖

去縣東六十里其巖高廠若慈雲普覆舊立梵宮於其下

白巖宮

去縣東五十里四圍陡絕獨立一峯舊置梵宮感神力助焉危橋丈餘非誠敬者莫渡

春花寨

舊傳其地有池半畝至夜光茫閃爍有如皎月近視之則若無焉

古木塘

去城北三里塘有一木不知流自何年半浮半沉合抱不止青絲旋遶望而畏之土人暮夜時見其露形江岸百餘年春水泛漲穩載如故

白龍井

在縣東北二十里

石牛塘

在縣北三里昔有善水者入淵而見其形前足仰而立後足俯而伏青系飄遶冷氣襲人不敢近焉

金沙塘

在縣東四十里

荷花池

在縣南門外中有臺圓十餘步朱君立亭于其上架木橋以渡明末十餘年藕斷花絕國朝開闢花復發生至今茂盛詳見瑞蓮詩

天柱縣志

上卷

七

金井溪

在縣南二十里

千佛鐘鼓洞

在縣西三里萬曆壬寅朱君因修邑志選勝于斯入其中可容數百人進數十步微露天光千佛院見石懸若鐘鼓擊之有聲復有清流從中出冬溫夏涼朱君遂命名曰千佛鐘鼓洞又題其石曰天下第一奇洞云中設木亭圍以朱欄今廢之詩記詳見藝文

相公塘

在縣北三十里

得勝嶺

在縣東二十五里

黃花坑

在縣東四十里

紫雲巖

舊立真武堂于上前有三石峙立若儀門去城北里餘

城池

攷城池之設所以爲衛也衛則欲其完不完無以衛我倉庫民物也天柱有城而無池隸于山也城毀於苗者二而完之者亦二爲制度狹小苟計目前也擴以充之分以築之時以葺之不容彼玩此忽遂定爲永制焉

天柱舊爲土城洪武二十五年苗叛城遂圯無完堵復築以嚴保障額二里七分宣德二年爲虫蝦苗所圍幾陷上委平溪莫指揮平之自朱君改縣捐金市

天柱縣志

上卷

十二

地展城一百八十餘丈擴舊額爲三里三分諭以綱繆未雨一勞永逸之計惟時民苗子來不踰月告成上覆申樓五百五間設四門城樓四座別號鳳城自龍井以西至南門爲苗城由南門以東至龍井爲民城民苗各爲修葺作展城記以志之蓋苗原轄於所而民新附於縣者也崇禎丙子年知縣王君良鑑申請改治丁丑年石君之鼎遂遷至龍塘不數年何知縣爲苗所害明朝俞君廷薦乃於雷寨作縣治丁亥夏六月十三日被諸苗攻破燒殺七十二人壬辰義

王勦平之命知縣黃君繩憲武弁閔鍾繩來是邦諭
勸民苗各照原額城垣自爲增築遂相沿至今柱之
人宜遵先制可也

東爲迎恩樓

係舊置修葺之層樓三楹石臺一座橫
接城垣

南爲迎薰樓

甲午年復置之層樓三楹石門一座月
城環其外焉

西爲懷遠樓

葺舊置而新之層樓一座月城圍其外
焉

北爲拱極樓

甲午年修葺之丙午年回祿丁未年知
縣黃公復創之層樓一座城環其外

公署 倉庄附

古者聽政宣上德達下情公署之所由設也萬民之瞻仰一邑之規模于是乎在所以無媿幽獨無媿大廷上之可以報君父下之可以慰民生則問諸居是署者

知縣署

舊署在縣之中萬曆丙申春 朱君梓建丙子遷龍塘遂毀焉甲午春復舊治而署更新公堂三間堂之前為抱廳堂之左為庫右為兵房後為川堂川堂之

天柱縣志

上卷

五

左丈餘為東廳川堂之後又三間為三川堂由東而上為內衙皆南向公堂之下東為吏戶禮為奉發舖長西為總書為刑工儀門三開儀門下左為祠以祀土神 係寅賓館舊址丁未冬知縣黃公建之 右為獄以處囚犯 丙午春復創 前為鼓樓下數級隔二丈餘而屏墻立焉

典署

舊在縣之右側丙子年縣遷龍塘遂廢之甲午春亦同建焉丙午春延毀丁未冬復立正廳三楹與縣之川堂竝廳之下左右翼為書皂房前為門後上數級

為川堂為內衙抵觀音殿

分司

萬曆二十四年孟春建舊在南門左側前抵城後抵晏公廟丙子毀康熙五六年知縣黃穆功德府以建之今頽廢存其址

義館 在城之南舊為所治康熙二十四年奉文新立焉

叅將府 在城之東與縣衙並新設之即古學基

儒學 在城之東開創之初縣學並峙縣居右學居左今叅府即其地也因徙城南所吏目廳

江東司 在縣東五十里久裁 鎮遠司 在縣東四十里

天柱縣志

上卷

六

僧會司 舊未設

道會司 舊未設

天柱倉 舊在南門內分司右側之前

永豐倉 舊在分司右側之後俱廢之屬營房今徙置西門內之右

學倉 舊在古學之下今廢之屬叅府

演武場 在縣南門外長六十六丈寬三十六丈上有演武廳前後各三楹將臺一座

黃田公館 在縣東七十里 朝陽公館 在縣東一百里

來溪公館 在縣北七十里 新市鎮公館 在縣北七十里

興文官庄 在縣東十里 永豐官庄 在縣東三十里

銀鳳官庄 在縣東十五里 金鳳官庄 在縣東二十里

阜國官庄

在縣南十里即今南坡哨為學田

玉屏官庄

在縣南十里

永寧官庄

在縣南二里

安樂官庄

在縣西二里

定遠官庄

在縣西三里

太平官庄

在縣西四里

永泰官庄

在縣北五里

育民官庄

在縣西南十里

永興官庄

在縣西南十五里

以上倉館官庄俱萬曆二十五六七年建

養濟院

在城西之後街舊對設平屋各五間門一座今廢之屬營房知縣王君現卜地起造

漏澤園

在縣東門外五里朱君捐俸買地一幅長二十六丈寬九丈以瘞貧不能葬者

學校

社學附

學校爲人才之藪教化之地士先德行而後文藝
端所始也天柱在所治之年已漸知文教因割會
之口鄉倡率鼓舞都人士愈知敦崇節義蔚起文
章迄今明經歲舉者閱二年得一登賢書擢巍科
者尚未槩見由此文明日起戶誦家絃則名存而
實亦附也今奉

繪音修崇

文廟爾多士恪遵

天柱縣志

上卷

六

聖訓爭自濯磨庶無媿乎濟匕峩匕之譽矣

文廟

舊在縣東門內萬曆下酉夏朱君率邑人建殿廡祠
堂齋衙門坊池橋以及鼓鐘樂器俱備一時選舉登
仕籍者不少概見丙子縣遷龍塘學并毀乙未縣復
舊治乃建于城南分司地康熙元年黃侯遷所治學
宮三易所矣無異乎選舉不聞明經空老邑人士減
以風水是尤謂城北一隅可以妥

聖發祥甲子春余聚多士斟酌之僉曰善遂遷學宮

于城之北捐俸二百餘兩市地興工一遵舊制維新云

正殿 三楹作西

兩廡 東西各五楹

戟門 三楹

櫺星門 三楹

泮池 半壁形在櫺星門內

青雲橋 仍其舊號

啟聖祠 明倫之後

明倫堂 左殿之左

尊經閣 殿後有基未建

按學宮三遷兵火叠遇樂器祭器百無一存今殿祠堂無重新自應漸次捐構不預為登記昭明信也

計買民地

貢生蔣正時地 一幅價銀貳兩肆錢

生員王需賢地 一幅價銀貳兩八錢

天柱縣志

上卷

十九

生員楊文洙地 一畝價銀六錢

梁材倚地 一幅價銀六兩四錢

楊浩然地 一幅價銀七兩續擴買八錢

胡舉安地 一幅價銀貳兩伍錢續擴買壹兩

以上共計地價紋銀貳拾叁兩伍錢

附舊設學院

開化書院

舊在城東學宮之前朱君建之置田租為子弟延師肄業之資今廢之屬 叅府前

屏墻地

興文社學

在縣東十里 朱君遺像 在焉舊置有黃保田一畝王朝判田一坵又開墾平南岑

多灰脚田三畝五分并店四間每年收租以供其費

寶帶橋社學

在縣東五里橋之右祠之左朱君建焉羣鄉子弟而教誨之其作人也至矣今廢其學其

址尚存

鐘鼓洞社學

在縣西三里三元宮之左舊置有田以食教讀者惜廢之

聚溪社學

在縣北七十里俱萬曆二十六年建今廢之

天柱縣志

上卷

三

附遷建學官記

學之建也有國有郡有邑而大中小學分焉名不一也其實則歸於與教化植倫常端軌物如命夔典樂臨雍教胄俾斯士之有德有造在泮之獻馘獻功率是道也然中土之學與邊圉不同中土流風深遠凡經明行修者發潛德之幽光而志在功名顯燦之儒一旦釋褐駿皇路又皆爛文采尚氣節處則不負所學出則不負吾君何一不得之義路禮門耶卽中有沿革變遷彼都人士請於學使者告於朝廷不轉睫

天柱縣志

上卷

三十一

而隨廢隨舉俎豆千秋無恙也維邊圉則有難槩論者菁莪棫樸之未深黨塾膠庠之不脩而單寒士子負耒橫經相出入其間滄桑播遷烽火流離方室家閭閻之不逞恤而尚冀其整類壁荒碑芹宮蔓草於劫灰寇燼之餘何可得哉何可得哉雖然人才間世而生地氣百年必變使必執拘墟見以爲邊圉之學不侔於中土將培塿非山而可至於山川澤非海而可至於海鳴呼謬矣抑又不然余以壬戌春杪奉命承乏柱邑甫下車觀斯邑也山環水抱知必有惠中

秀外之士挺生其間無何而人文岑寂半皆鬱也茲
土卽有二三讀書稽古輩傲岸自異亦如魚龍之隱
大壑屈獲不得伸何以故邑士子僉曰此地苦兵役
隔於僞晉秦凡廿有餘紀縣治遷者二學宮遷者三
中間以吳逆猖獗雖學宮未委諸艸莽其如蹂躪化
離何暇問宮墻事地之不宜人之咎與天之厄也余
歎息久恻也朕如有所怵今值

聖天子廓清海宇採列郡之舊志彙一統之成書又復
臨雍釋奠重道崇儒爰下

天柱縣志

上卷

二十二

綸音合十五國之

文廟而鼎新之是誠爲天下開文章之祖而士子際風
雲之會也余不敏徵博士弟子員請而敢自謝曰非
予之責也夫爰以遷學舉謀諸通邑紳士相與樂之
謂余曰郊之北去城不數武有山址渠水鄧堪輿曾
矚目余朕其請因命竹輿逆之來諸士從往觀焉及
登巔而眺文筆峙其前金鳳迤其後明堂軒殿碧水
滌洞左右環繞諸山如屏列錦幕然至於支分派衍
起結迴顧之形勢則藉有堪輿之雙睫一指予又何

能窺其涯涘哉諸生皆曰善因以期費請余曰不佞
等之熟矣寧待諸生言余薄有微俸近奉

旨新復敢卽以之爲遷學費再補其不給約計之或可
觀厥成因市地卜吉鳩工庀財諸生亦踴躍趨事爲
殿爲廡爲明倫爲啟聖爲池橋甍牖爲櫺星左右戟
門悉遵舊制而更新之是役也起於甲子之春竣於
乙丑之夏鼓鐘篚簋之屬尚未備舉竊有逮而不佞
更欲爲諸生獻其愚夫廟以文稱人文萃焉試爲之
取象於山文之修然而整飭者高山之仰止也文之

溫然而秀越者玉山之清曠也文之蒼蔚而聳潔者
極目兮芙蓉天半也文之排蕩而率律者置身乎泰
華峰頭也文之杳乎鬱乎而縹渺無際者山在翠微
煙靄間也他如離奇縱橫有類乎幽巖怪壑峭嶂層
巒雖曰胸期磊落不可一世槩而此中有奇士卽有
僻士唯識者辨焉何也士之行先於文行之不勅焉
用文之夫行卽士之表也表正則影正表邪則影邪
可不慎與善願此邦人士行成名立風範則嶙峋玉
尺文章則擲地金聲與樂之條理相終始由此而作

賓

王家爲柱石爲棟幹卽所如不合而廉隅端方昂藏俊偉與噐之瑚璉委鼎相輝煌由此而鄉里知所矜式多士奉爲楷模是則聖人之徒也是則余之初心也後之來令斯邑者入其廟登其堂進諸生而諮諏所未逮庶其增修培苴擴棟宇松雲之地躋聲名文物之邦豈尚遠圍云乎哉若謂今日之舉固已美稱善也余又何敢

昔

天柱縣志

上卷

三十四

康熙二十四年乙丑季夏之旦知天柱縣事甲子分

校楚闈同考試官捫霞元一王復宗謹誌

附鄧堪與學宮來厥序

建學明倫由來尚矣然建學以人傑爲要而人傑以地靈爲先地得其宜則學校興人文盛固捷如影響者也柱邑秀士謀徙黌宮幸逢

聖

天子飭令維新

賢令尹嘉惠後學召予而咨諏之

予渠東一鄙人耳蒙承召杜之榮光媿乏廖郭之妙術謬應此舉買土來前與諸紳士登南山審鳳城形勢自巽方發脈疊起金水二星轉入丙午分派三枝其正枝直從城南至縣衙結局坐北向南迴龍顧祖

大柱縣志

卷

二十五

右枝由南郊而東下盤旋遶北爲護托之神砂左枝自武場而西來峽過了坤起土星爲玉枕申庚雙龍入首金水二星結局扞作酉山卯向取了酉丁卯分金取巳酉天運龍坐穴前面文峯雙聳辛峰後起玉帶重環水纏元武氣遶青龍榜列城垣印浮水面前呼後應氣象萬千右伏左降精神百倍考之心賦驗之天機未有如斯地之允吉者也頃值清和之侯况逢上澣之期新

聖殿之棟梁光公門之桃李香飄月窟文闢天荒萬里

扶搖子弟仰宮牆萬仞千秋遺愛春秋共俎豆千年
敢摠管窺敬陳郢正

天柱縣志

上卷

二十六

附 各憲條議

湖廣辰州清軍府署直隸靖州正堂事張 爲諮詢地方利弊以資採擇興釐事康熙二十三年六月初二日奉 提督湖廣通省學政按察使司僉事姚 憲牌內開康熙二十三年五月十四日奉 偏撫都察院丁 批該本道呈詳據長沙府詳陳八條內稱一興學校一欵湖南兵火之餘士貧業荒無惟其狀但可異者一經採芹便充里長不離衙門其抗賦包差與詞減訟認爲長技相習成風卽間有潛修向學者

天柱縣志

上卷

卷五

則必羣相竊笑目爲迂腐是以合邑絃誦之聲幾成寥々絕嚮故上科秋闈湖南登雋僅得數人而春榜並無其一雖有聰穎可造之資唯工出入衙門之術無復奮志青雲之望請飭各屬如有生員強充里長者許卽申報學道註冊臨考之時將曾應里長者另造一冊其該學劣行生員卽于此冊內舉報革黜其餘當場文理但稍疵謬者立置劣等文藝雖優者亦不許列爲一等似亦訓化之一端也又楚庠雜濫已極本一武生也乃已經黜革矣猶稱爲生員更有社

師相禮吏生等類無不冒稱爲生員彼既無鼎可愛則一無所不爲惡莠亂苗此之謂也似宜清釐以正士體併宜嚴飭各學查取月課呈督學道品定該學所課文藝分別優異庶士業知勤而士風漸端矣等因到院據此除詳批據詳清匪類正風俗二條候卽行查禁其招流民積貯學校恤獄諸款候酌行並分檄布按學司道議詳行繳等因批發外所有與學校一條合行查議條牌行道查照來文事理卽將此款凡生員內有充當里長者臨考之時另造一冊以備

考取優劣是否可行作速查議詳報以憑酌奪施行至于已經黜革之武生及社師相禮吏生等類冒充生員名色該道卽行所屬嚴禁毋得冒濫名器并作何飭令教官每月課試文藝或送該道品定宜何如立法舉行一併妥議具詳仍將遵行緣由先行具報併令各屬徑具遵依報查速化等因奉此該本道查看得生員不許出入衙門包攬錢糧起滅詞訟皆

切令所嚴禁本道蒞任以來申飭再三頒列教條告誡諄上責成司鐸按月課藝董戒總期大創積習以立

防維也無如習俗相沿流波莫挽以故抗官欠賦經各屬詳報者不一本道每遇詳報必批行革究從無寬假因念士爲四民之首自宜早完正賦循謹自愛爲斯民效法豈宜刁抗成風健訟成習以貽宮墻之玷復念楚南蹂躪之餘學校荒殘冠裳淪落由于士習未端文教未振本道深用憮然茲值 憲臺雅意作人興起教化多士蒸蒸日上然想見棫撲菁莪之盛矣嗣後文武生員概不許充當里役以里役有督催徵輸之責有經管收納之司士爲里役必致終歲不離

長吏之門頻年唯與胥役爲伍坐見雪案塵封芸窓蠹積無復詩書之念士氣頹靡職是之由甚或任意包攬互相訐詬錢糧拖欠未完同甲扳扯莫辨官吏着落無從身名屈辱難免又安望其攻苦向上奮志青雲也本道一面通飭府州縣不許文武生員點充里長但恐積習生玩未之能改必請 憲威立法嚴禁永爲遵守本道職司董率除歲科兩考嚴行甄別外仍封發課題責成教官按月會集諸生課莠悉心講究有不到者以曠學論黜課竣該學評定賚卷覆

閱卽以該學督課之勤隋定其考成之殿最庶幾責成專而學校可興廉耻勵而人才自起又何患乎士習之不端而登雋之鮮人耶至于該府詳稱生員充當里長者另造一冊以備考定優劣等語是仍存有生員當里長之徑且本道巡校唯有等第格冊彌縫卷唯憑文字位置不便另冊分別卽舉報優劣原關士子行止亦不便專求之生員當里長之內再如已革之武生學冊旣已除名卽與齊民相等何又有冒稱生員之事他如社師等類不過稍示作養原非子

衿之比豈有冒充生員從前俱已嚴飭如有冒名生員干犯規條者卽時申報與齊民一例治罪通行所屬遵照在案茲應併請 憲臺再行嚴禁以加儆惕者也緣奉查議事理相應具文詳覆伏乞 本都院俯賜核奪批示遵行等因奉批生員再有充當里長被人首發或被該管官查訪申報者除褫革外仍行拏究餘如詳一併通飭各具遵依報查繳奉此合行通飭爲此備牌行州查照牌內詳奉 院批事理卽便轉行所屬各該縣衛並各學一體遵照仍曉諭文

武生員嗣後不許生員充當里長出入衙門如有不肖子衿仍不遵戒闕克里役包攬錢糧或被首發或被該管查訪立即褫革仍拏究治責成該教官按月課莖評定詳閱毋得懈惰曠學務期董戒嚴明養成材器以副 本都院興起文教至意其社師等類不許冒稱生員干犯條例有負作養敢于故違許該管官卽行據實申報以憑嚴究決不姑恕凜之母忽仍各具遵依徑報 撫憲並報本道查考毋違速上等因奉此合行通飭爲此仰縣官吏查照牌內詳奉

院批事理卽便轉行該縣學一體遵照仍曉諭文武生員嗣後不許生員充當里長出入衙門如有不肖子衿仍不遵戒闕克里役包攬錢糧或被首發或被查訪定行詳報 本道立即褫革仍拏究治責成該教官按月課莖評定詳閱毋得懈惰曠學務期董戒嚴明養成材器以副 本都院興起文教至意其社師等類不許冒稱生員干犯條例有負作養敢有故違許該管官卽行據實申報本州以憑詳報 本道以憑嚴究決不姑恕凜之母忽仍具遵依徑報 本

都院并本道暨本州查考毋違速行須牌
康熙二十三年六月十二日行

天柱縣志

上卷

六

卷

